

百名家詩選

小引

魏子曰余過白門訪知名之士惟與治藥子稱
首焉與治往矣宛陵施大叅輯其遺詩紙貴金
間可爲身後知己藥子則遊京華歲且十稔偕
廬江龔宗伯善也人爭艷之曰是其知己也身
遇之恥與治爲尤隆余曰不然名者實之賓也
身有所由立道有所由昌而後名以副焉顧與
紀二公貞者也貞者十年不字宛陵慕其貞而
傳之廬江愛其貞而禮之其好均也亦必二公

有可慕可愛者存也其可愛可慕者何也曰道也道昌則身立身立則名貴其詩自不朽于天地間近代徐天池盧次梗陳白雲皆得一人以不恨此物此志焉耳余采補石倉闕里孔觀察以藥子詩來復出宗伯八行敦切贊歎焉曰是藥子知己也身遇之也眎與治爲尤隆可也

百名家詩選

福清魏 憲惟度輯選

秀水何元英蕤音 山陽馬 駿圖求

叅

華亭沈 荃繹堂 福清翁 白未青

紀映鍾 號槩子江寧人

學圃

我爲東湖樵子學南山圃相逢大道傍雪涕問
勞苦我逢女貞樹再拜不敢斧子有東陵瓜屢
潰深秋雨生事尚飢寒吟詩坐蒿堵

城邊路

城邊路歌舞處十年變爲墓十年犁爲田十年
成淺渡

關山月

邊月何淒淒邊霜送馬啼無情沙磧水日夜下
遼西

陽春曲

曉聞鳥語喧啄碎簾鉤玉時光不相待坐起惟
忽忽塵生寶瑟紅絲寬春色年年在閒綠

寄塞上人

葡萄酒天下勁趙女天下白英雄雖失意割肉頗
自得邊草色萎枯胡笳氣蕭瑟憑吊古戰場千
秋動魂魄

和謝康樂

南風吹高鳥輕颿切浮雲洪波寢以馳衆山迢
遞分登樓聯八荒結思徒煩殷風烟縱寥廓念
與子爲羣情言敦在昔離別悲長勤燁燁好顏
色抗手阻塵氛論心展悅豫傾抱鄙見聞不信

三五期渺若河山紛白駒靡返轡蘭苕墜朝曛
日莫山上松謾謾猶爲君

任心置丘壑群力競茲時畚鍤一何勤要與習
懶宜流泉靡輟響靈卉密中籬開軒俯南畝層
岫綿參差山翳滌亭午卓然見好姿鳴鳥鮮狎
至清風若相期睡起罷書帙徙步看前陂東臯
方作始農事無疇咨固違塵世轍葆此嘉遯奇
彥遠別我南歸

記昔乙酉歲斷髮出奔走城西黃葉村安禪傍

枯柳潭風送蚤秋山雨暗牕牖隣卑兩瘦僧煮
茶自相耦白雲停幽谷寒泉注淺缶趺坐無他
言一卷嘗在口問爲誰氏詩喃喃稱老手予謂
老手難古人寧幾有展帙覺異色竟讀歎且久
靜氣果不羣紛華豈能誘鏗然聲律高定識精
神厚旣道姓名罷行藏更非苟淡比松下禪堅
類柏舟婦一家河渚栖梅花帶左右入林恐不
密數峰當戶守內子亦苦吟研山間井臼置君
神仙中轉覺畫圖醜此語今十年夢魂未曾負

學學千秋名淪落同敝帚投刺長安道錯愕辨
真否燒鐙韓子廬濁醪傾幾甌平生性命歡獨
此堪不朽長歌貽蹇修再歌示良友環堵生烟
霞真懷動星斗何意超古初祗不落人後春到
理歸鞍故人備糗糗却恨邢臺令敎我西山偶
離合固難期曰歸母迴首湖上多桃花礪中羸
南畝莫帶長安塵輕點溪頭酒

慈仁寺訪彥遠用前韻紀事

二月風氣佳出門待新柳騎馬慈仁寺

迎

馬首傍松入高門披帷見我友寒退土垆間日
色在低牖主人半病眠應酬費心手捉筆方攢
眉見我笑開口開口便說詩大致歸一厚謂我
善七言歌行尤勁陡五言力固強多作慎莫苟
此語見至誠佩之如琳玖我愛與子言妙意入
醇酒促膝夢天涯爲樂享做帚汲泉累僮穉設
果探餅甌屋下春鳥鳴牆上松濤走家書取示
予絕不及升斗苦心懶自明摧挫棲塵垢我有
千竿竹別來翠應朽子有千株梅何人爲子守

我有一閣書野鼠蝕蝌蚪子有一片石雲根棄
培塿我有五嶽巖剏敝不在肘子有蒼精龍抑
塞不敢吼山川間良辰天地徒爲耦獨將向上
機相勗閨中婦惆悵浮雲過瞠目立許久我子
事事同我生重重咎願移白下居就子河渚畝
來往見風流二老世外有揮涕忽歡然不覺日
當酉更訂月明時招要固哉叟

叟韓詩也

寓三山雨中述懷

人日至春分日日雨不止朝曦澹林端陰雲已

凝竚初猶灑。窓微漸作翻渠駛。宿莽未萎黃。新
艸怒生肥。北牕暗如漆。飢鳥下啄紙。羣兒樂未
央。志士悲年齒。

雨中百端集。繞廊忽行吟。自我當暑來。居諸春
已深。桃花散林綺。叢桂日抽簪。遙想幽人間。花
下鳴素琴。贈我一端綺。與我稱斷金。泥塗白日
阻。空睇南山岑。

谷鳥鳴喈喈。好山弄眉嫵。流雲靜不飛。懷人在
東武。誰將嶺頭梅。寄過瀟湘浦。落月照蒼梧。春

風徧薜杜佳人渺難期愁多不堪數

烈士貴有身聖人亦無位冥鴻旣高飛衰鳳猶
一至曄曄千仞姿卑棲狎狂鷺已知不可爲大
義終難避慨然成春秋不易匹夫志後世隆中
人出師得其意

夫子手植檜

古檜真神物側起殿北隅彷彿龍門桐百尺枝
柯無細文自右旋千轉如羅繻厥狀類槁隕膚
理獨精腴榮悴關興革曾不爽斯須竊聞子手

植純氣綿扶輿渺渺一微木運與造化俱易姓
固常理天道貴如愚夫子亦何言四時任來徂
願言曷我檜珍重報苑枯

荒村早行

村村趁集人曉行曉月自照繁霜明石橋壓水
水不動秋虫棲草啾啾鳴誰家蓐食不早起瓦
瓶汲井聲齒齒風火猶光亂草檐前山日已半
峰紫寒風射眸如細霰北行竟日背日面却憶
南村就曝時迴首踈雲送孤雁

報國寺雙松歌

落落何朝十二松兩松怪誕難爲客求之骨貌
意已失尚想天外超忽雙雲峰白日當空集風
雨紫氣盤蓋藏芙蓉一日一看一奇特百步之
餘尤荒惑或言此松似石鼓水苔蝕籀缺釵股
或言此松類神駿蘭筋決滅秋霄迅或言此松
其太古無懷氏之民邊幅裂盡存吾真偃僂錯
愕任笑嗔不知嵯巖與朝市類然放足三千春

補山堂歌爲芟菴老人作

茫茫楚澤黏天綠中有老人結茅屋淨洗腸胃
臨江流看盡虞淵又暘谷却訝門無一片山秋
瀾萬頃空滯潏挈舟欲採芳蘭去居山不見悲
潛潛會當割取熊耳峰頭千仞石嶙峋置在鴻
濛澤打鐘夜攪懶龍眠振衣直上摩霄碧爾梅
居士何人乎噓翕雲漢移蓬壺張目一掃巖壑
出峭冥截崑崙頃刻插在練光鑑靚之明湖造物
缺陷我不問誰能補山祗須更五日一石十日
水神速得如梅也無老人一見發長嘯渾然自

謂愚公愚乘風浩蕩睨八極手排閭闔叫蒼梧
嗚呼手排閭闔叫蒼梧

送鍾子黃歸鹿宕

送君歸鹿宕山色正蕭蕭雨氣江湖白秋聲日
夜驕殘書披礪戶幽鳥待松寮他夕天門月鍾
期信可招

冬日將往淳湖夜宿徐鄉汶閣次壁間韻
荒磯背郭靜日暖臥沙鷗水落增高岼烟微沒
去舟早梅偏近寺冬柳尚遮樓一榻消長夜隣

鐘幾度秋

秋牕倣韋蘇州

病起北牕下池塘轉夕陰山雲淡歸鳥城闕動
清砧卉吐秋容變波停碧藻深主人有高適抱
膝日同吟

廟壇月

皎皎新秋月高飛老樹顛廟壇芟寸草樓閣掃
寒烟隣時松聲靜家山鶴夢懸大河南北限目
送白雲邊

登太行絕頂

西來雲氣接崑崙匹馬登臨絕頂尊
蹶起雄爲天下脊歸然恒作晉陽門
沁流一道穿河水上黨孤城俯太原
迴首武靈戎服地暮烟荒堡自朝昏

天嶺交盤并豫分客身常逐雁爲羣
至今洪上無修竹終古山頭有白雲
車轍漫迴悲竭澤樓船曾下濟橫汾
霜清九月裘如鐵此夜寒砧何處聞

張幼仁園居

結構幽居侶輞川
鷺峰鹿苑一溪連
天涯白首歸張翰
海內丹山老鄭虔
高閣三層懸暮雪
荒畦十畝刈寒烟
城陰宅近堪來往
古路鐘聲不紀年

題丘季貞西軒

楚州秋色在城西
千樹梧桐晚雉齊
亂後自餘明月好
霜前仍有子規啼
連山送客悲芳草
向晦齋心對碧溪
十笏一軒書萬帙
蒼雲深隱鳳

雉樓

廣陵夏夜同與治半千蒼畧楚吟城北村

舍次與治韻

顧子乘舟江霧昏杜龔促膝坐前村白雲滿地
隣僧磬黃葉封溪處士門傍舍只須山一片閉
關常得酒盈尊最憐合併如斯少夜半傾泉煮
北源

湖上逢曹秋岳都憲承贈新詩次答

憶傍長安卿月清東方千騎五羊城如今林下

添真隱不問寰中失老兵遠埠舟移雙岸雨夕
陽樵斷六橋鶯天涯聚會乘佳日獨抱閩山夫
住情

陳孝兼自閩過訪京口山寺喜作

聞君樵牧萬峯幽握手何期在閩州破衲穿雲
來嶺外黃梅歇雨坐山樓懶留鐵甕軍城酒欲
採江籬漢水舟垂老逢君頭白盡不堪重話十
年愁

歷陽書懷

茅亭山色借隣家
霜後東籬尚有花
一雁西南啼過雨
半江風月送悲笳
災祥數攷京房傳
天地空浮博望槎
垂老倦遊如轉轂
虛將軼軻紀年華

城闕啼鴉返照殘
蕭條極目水烟寬
雲埋鷄籠香泉潔
月暗烏江古廟寒
牛馬颺馳誰挽轍
乾坤人老幾還丹
白沙紅蓼孤舟在
只向滄洲買釣竿

雙流古栢儼林丘
鐘鼓郊原動暮愁
巖樹秋紅

藏烈碣江燐夜白釣魚舟三年炎海凋霜鬢百
里驚濤轉石頭行過荒祠空俎豆不堪生酒爵
周侯

忠烈祠周侯名虎臨淮人破賊功奇絕謝
德輿爲之記

何麤音新居畱題

卜築新居似草堂琴尊深擁竹匡床鳥聲林外
連方澤雪路橋西近虎房萬里徵書曾出使十
年通籍尚爲郎剪燈投轄情偏重聽到鳴鷄舞
更狂

史遠公以黃山遊紀相示奉畬

君從湯口尋山去直入千峯與萬峯纔有路時
三磴雪絕無人處一聲鍾雲綿忽漫藏丹灶瀑
布長懸濺白松披寫幽奇隨意出却疑拄杖是
蒼龍

舟晚

洛罷坐船牕風吹草香歇河廣萬星涵長庚大
如月

秋牕

疎雨暗秋牕秋光淨如濯飛鳥不知人徑下階

前咏

題王石谷畫

渡口有人家芳樹蓋茅屋
勞勞待渡人不向酒家宿

數峰插天外如削石鍾乳
寒林暮色多疎鐘到深塲

春山可憐碧春水平于鏡
承旨山水姿媚中有蒼勁

同戈驛

唐太宗起兵處

李花開出晉陽宮義士同戈氣決東
衰草祇今無馬跡滿山落葉戰西風

送邵蘭雪

家住姑蘇烟水寒燕山炎夏拂征鞍
塵中任鎖書千帙去釣香溪月一竿

題畫

荒村十日雪飛蓬枯樹無聲定晚風
相對草堆燒梢榴喜無人跡過橋東

小引

魏子曰有唐以詩鳴蓋本業也大曆而下不啻
波流隆則隆汙則汙論其世可已當世以詩鳴
則夢闢伯仲獨著于天雄時雖多材超乘而前
去輓近世千里矣而必推其本于智侯太翁蠲
起啟禎間駸駸進于大雅以睥睨中原後此者
莫與京焉余索其遺編以長卿著書人多取去
對從百城擁坐中得一帙佚者半曰擬封禪書
耶細讀之皆李杜名篇體不相沿而辭不相襲

混然同氣鏗然同聲蒼然同色求之古者不多
獲直欲藏之石室與乾坤共永嗟乎山川竅矣
吾其敢閉塞也哉

百名家詩選

福清魏憲惟度輯選

曲阜孔胤樾心一武進劉維禎瑞公

廣平申涵光鳧盟元城黃蒞若石笥

叅

劉六德

字智侯大名入

初夏過張定甫郊居

結廬帶廻岡長林鬱其隈叢藹滋雲亂雜芳逼
路回徑苔濕欲漲槐影厚如堆到門望曲亭花
氣出牆來遲君久相招一晤亦艱哉未信耕耘

苦道顏自美，慙清榻爲我。設素琴對君，開莫言
止酒，便步檐有樽罍。草窻風四面，曲案舉雙杯。
春英入夏繁，延蔓不經栽。鋤瓜想餘慨，治畝見
經才。貧兮吾輩氣，靜者道之媒。逍遙愛桑陌，慷慨
登古臺。日長曠淡好，斯地絕嫌猜。暮將入城
市，清機隨塵埃。

平干道中

驅車十月交，遠上寒山陂。倏爾川原異，悵焉呀
路岐。大野邈無際，長風當面吹。遠天落沙鳥，寒

林檎枯枝日入村墟淡烟橫丘隴悲我行駕疲
鴛寂寥寸寸移寒湍遲夕渡暮雲蔽餘曦望望
樹中村依稀掛酒旗旅人共指點一醉固在茲
去婦詞

願歸不肖軀勿使君傷怒事君已傷君何如尋
卻步逝將自疎遠除滌新人路新懽未有人君
家窘朝暮願充行媒使爲君廉織素君心愛憎
殊妾則深知故舊人愛意往新人應緣出何以
識新人但與妾都異伐柯比之子君情穩得遂

却堅百年好是妾報君義

戲效讀曲歌

髻樣堆來裕修容宕處工素心深歛飾芳帷最

瓊瓏

一解

隨意光絲履偶弄堦前步爲君閑眼多

細細行將去

二解

每去不回眸只須強前走已知

方顧儂作意俱向後

三解

同是木石心自許泛相

顧何意動徘徊羞得嬌無度

古意

纔見桃花落桃實鬻滿道昨夜雨生苔眼看又

秋草念彼歲華疾願言日傾倒

小蠅甫能飛已被饑鴉啄有翼不知時何如守
其殼

東家有少婦早起乘涼天濯髮淨有光自出掃
門前長日無他事安坐意泰然

臘日微雨過普照寺

臘日寒風改徘徊到上方雲深薄曙色雨潤起
塵香老檜芬層閣清笙出翼廊塵緣到此淨已
覺似春光

題夢中詩

空居絕勝想却夜夢逢詩是我幽清影憑誰矧
燿之憶忘爭此息深淺任翻奇亦既呼燈記虛
明宛在茲

寒月

月既水之魄於冬方盛明不如秋風雨况妙雪
陰晴肅肅霜空淨遲遲永夜情每能體此意寒
甚坐深更

贈斲琴防羽客

是王又日弟子故云

茲器寂寥久高人觸手生靜知絲木理不獨爪
甲聲一向精成癖千秋孤調明爲君起逸興鼓
對秋空清

雪

野與天同照光偕靜作晨風煙一清警物色共
知春幽意到鴉伴殊情獨翠筠滿林花壓遍梅
却未全勾

偶成

晴暖猶無定園林亦漸來遠條觀柳意低樹探

花胎酒隔前冬熟，軒當正午開爲嫌春事滯日。
日繞庭梅。

長至日大人陪祀郊壇賜膳盒咏絲寓糖
引出纖於縷，輕文錯落加天庖。織女供龍海夜
餃，誇蔗化桑生繭。蛛爲蜂吐花，聖恩千萬緒。特
賜近臣家。

虎睛糖

爲訝天厨異，盈盤聚虎瞳。寒光悞馮婦，彩色盼
支公。映燭妨飛火，開函欲引風。山中逢漢將，月

黑按雕弓

客館

車馬自風塵淹留倍愴神僕爲同爨侶僧是補衣人沽酒遲來客無燈早倩鄰破窻風雨劣愁坐更霑巾

雁字

帶雨濡烟宛轉迴洛圖一畫半天開倒江橫折龍蛇影溫月平鋪雲錦裁形是鳥文聲是訴譯爲嗟怨讀爲哀幾回玉塞音書絕極目遠入天

際來

欲語相思一字強兼葭浦上叫悲涼
南宮醉墨紛無陣子敬飛毫淡着霜
愛學紅箋霞一點錯
臨眉譜翠雙行天涯兄弟原同齒
悽惻河梁十
九章

春夜禪舫聽女郎鼓琴

小廊空響漾風林夜有仙姝攜素琴
窈窕自諧松澗意雍容不露鳳鸞心
欲彈若箇揮絃態曲罷君聽指外音
一攄忘言知有恨可容誰和白

頭吟

海棠葉

不向春前鬪麗姿
欲從淡冶學西施
背將紅燭牽羅袖
白洗鉛華愛翠眉
嬌性未慙應暗惜
羞藏不盡使人思
慧心亦恐傷搖落
不到脂殘粉退時

無題

十斛明珠莫浪誇
自從塵外謝鉛華
秋溝汙處清無骨
春嶼烟中妾有家
笑却秦城依故壘
不

嫌陶粟傍寒花爲因價重身難繫欲引長藤到
若耶

樓上待約

春郭雨初晴烟消花柳明高樓獨遠眺客至不
知迎

山家

小村無正巷盤曲兩三家薦麥皆新飯遠風吹
棗花

中秋

良宵圖閉門空靜待華魄獨有碧霄間清輝尚
如昔

人日過北郊酒舍

埜煖流晴雪廬香溫舊醅春遊吾第一誰解未
花來

彈琴

羲農久寂寞彈琴想其真偶有餘淡時悠然太
古心

竹窻

開窓面幽竹竹蔭秋苔濕微風透深叢清潤時
來入

楊花

不共殘紅落復倩東風馭到處向人飛似說春
歸去

明妃曲

薄命還當棄聖朝畫工須置一輕條料他只道
無鹽好未必甘心抹阿嬌

詞

明鏡朝來把淚窺君恩妾貌肯相隨年年花落
春風轉却畫宮中那樣眉

郊外訪友

芳草城邊岐路斜春風拂拂到山家主人置酒
銷閒畫茅屋開窓對杏花

憶夢

眼前事事棄如遺一夢無端顛倒思誰寫殘經
誰化鶴世間蝴蝶總相知

同黃石筍夜坐柳下

偶從靜侶坐風林雨暗雲香夜色深薄月欲來
穿不透依稀涼影散衣襟

飲劉伶墓側

寥落風塵老倦秋幾回不死戀盈甌此來亦有
埋身杵可許丘傍更一丘

小引

魏子曰此石笥黃先生留笏草堂詩也堂爲少師中五公所遺在元城之西石笥讀書其中以名花馴鳥自娛故其詩多悠然有會之致壬子春初與余杯茗間出盧次榭蟣蟻集相與論定至慷慨悲歌不忍釋手蓋其愛才之心出乎天性有不自知其所以然者非同于世俗浮慕之士黨其鄉之文人自爲門戶計已也今令器翮翮俱致青雲人皆謂少師忠貞之報不知石笥

之優于繼述者至深且長也讀其詩論其世知
其人願與天下共之

百名家詩選

福清魏憲惟度輯選

長垣邵煥元雪嵐嘉善曹爾珙十經

叅

東明袁佑杜少江寧金世仁嶠山

黃龍若號石筍元城人

雪霽

天地劃然皎寒光四望盈簷融春滴滴樹映玉
晶晶未免泥塗困真添白髮明杖藜無處所歲
暮若爲情

遊成八公野圃同劉印心

曠野開花圃秋深有客過閒雲三徑滿紅樹一
川多雙屐穿殘菊孤尊傍古柯樊籠今始出放
意一高歌

雨中蓮開遲賓德邁不至却寄

一枝冉冉照漣漪正是輕烟細雨時鏡裏新粧
添沐澤江邊獨立帶愁思何來好友空餘酒獨
着蓑衣漫繞池應有風香吹別院東隣宋玉豈
無詞

社集喜曹顧菴太史至分韻

天地嚶鳴候飛觴促衆英問誰主白社有客自
承明司馬山川遠相如詞賦精寒風逐客淚春
日故人情握手悲歡集當筵逸興橫人中瞻海
嶽筆底闢蛟鯨博雅群言折詼諧四座傾韓軒
成李賀維咏付裴生翻喜辭天祿天涯續舊盟

七夕立秋

疎桐影散月痕青淡淡荷香飛露螢共道雙星
渡河漢驚看一葉下空庭遙憐複道停仙馭近

倚秋光冷畫屏兒女共羅瓜果待老夫守拙懶
求靈

送別曹顧庵歸里

輝輝藜焰照蓬門一夕千秋得共論
藝苑方期常御李春光無計可留髡
鶯花澤國迎歸棹風雨漳南黯別冤
他日相思何處遣新詩細讀向黃昏

百泉

人眼何清綺湖亭落照西山光搖翡翠水色漾

玻璃身世歸圖畫行藏狎鷺鷥俗緣何日了
此卜幽棲

夜雪

空庭漠漠凍雲低萬籟寂寥夕鳥栖但覺清光
生夜色不知寒影動花暎浸凌那榻瓶梅冷搖
蕩吟魂江樹迷莫道袁安高臥穩夜來夢遶灞
橋西

探梅

鬱鬱窻前梅一枝橫雪意正當酒熟時試看花

開未

歲暮風色苦庭梅寒意結我欲探其花凍指撥
冰雪

登東昌光岳樓

層樓丹拱倚雲端勢壓青齊自大觀海上雲山
爭入座天涯詞客各憑欄城脚晚照征帆近木
落霜空去雁寒白首登臨仍是病仲宣愁思正
漫漫

登岱二首

五嶽名山泰岱尊
天開東臂壯乾坤
雲扶御道
千峯轉樹擁金宮
萬壑奔靜夜海光飛日觀晴
秋練影上天門
百王禮樂朝宗地
咫尺還疑近
帝閭

巖壑千重具渾淪
羣峯拱列似陪臣
光分齊魯
連仙嶠根轉星河出
海濱龍化秦松攫曉霧雲
封漢簡動秋旻
天風莽蕩吹寒色
萬仞峯頭一
粒身

邵凌玉學憲修郡誌成旋里送別

幾年海嶽震才名魏博于今仰鑑衡文獻初成
傾五馬旌旄南去動連城孤亭錦席驪歌起匹
馬霜天雁陣橫從此山川生氣色烟霞一路解
逢迎

早春咏雪和孔心一觀察韻

陽回寒谷早梅開人倚雪天醉臍醅色映年華
成闌苑瑞呈雲物見靈臺沾濡應候恩膏布瀟
洒隨風珠玉來應有清光連火樹六街絃服絕
纖埃

寒光一片映窻明
柳岸花溪處處平
春到纖葩應五出
風迴逸態欲橫生
尋梅踏去扶筇看
沽酒攜來拂袖迎
最是幽齋多冷韻
淡烟疎樹隱山楹

積素迎輝凍欲流
雪花又向早春浮
誰朝玉闕驅龍過
似下瑤臺跨雀遊
花撲瓊筵窺拂塵
光翻玉陛動鳴球
使君遙祝豐年瑞
高咏陽春醉倚樓

暮春過李弘甫郊居

春深門巷柳風斜有客來尋仲蔚家蠹簡無靈
懸稅櫛迴崗遶翠擁烟霞連天圃色隨遊屐趁
酒松陰帶晚花莫待夕陽沉睥睨牽帷春浪滾
晴沙

小引

魏子曰韓昌黎云天下事成于自同而敗于自異獨于詩則不然詩尊漢魏鄴下之才別矣詩盛三唐中晚之趨殊矣家握靈蛇人懷和璧取其矯然峻拔者庶無籬下之譏也宛平宋子飛先生以名制科督國離江淮之間稱廉吏公餘畱心風雅不屑屑于近人之習且不屑屑于古人之規縱筆所如意先之必以剗詞隨之必以剗剗也新也踞其巔則體迥矣詣其成則法老

矣炫其異采者却而避之與爰居之于鐘鼓奚
別焉昔楊子雲著太玄世無知之者子雲笑曰
世不我知無害也後世有楊子雲則必好之矣
然其時桓譚知之矣侯芭又知之矣歷今千百
載未有子雲而子雲之書固同敝天壤也余于
子飛之詩有桓侯之契焉因以質之孔觀察慨
許我

百名家詩選

福清魏 憲惟度輯選

曲阜孔胤樾心一、泰州張幼學詞臣

華亭王廣心農山 江寧張 惲南邨 叅

宋 翔 字子飛宛平人

棲霞寺聽月亭

禪寂山無賴
天空月印亭
雲流石不鎖
影落水
爲形碎耳江中
楫驚心夜半
鈴眼高何處是
徙倚快營屏

桂林冬至

一線牽兒女愁多與夢長不知將臘至豈是爲
春忙萬里吾家遠人情客路涼梅花方破白天
送歲寒香

江行雪

雨雪衡山路天涯萬里心孤舟虛冷掉殘夢壓
寒衾天濶雲遙落江空水映深歸來歌笑處驢
背快長吟

分水嶺北舟中得梅花爲甌供

嶺南無雪壓春枝遠樹梅花折入詩兩兩三三
香較韻瓶中顧影弄鬚眉

瘴厲欺春不早來先催桃李盡時開又將三月
梅花雨移向寒梢帶臘栽

岳陽立春

岳陽城外洞庭春誰是樓頭醉裡人江水猶流
樓已盡且將殘酒薦盤辛

閨怨

收拾脂粉殘凝眸不對鏡躊躇無語處簾影香

指淨

紅紅樹頭花涵濡修娥媚今夜明月光蕭瑟秋風吹

聞思

假寐臥香閣朦朧何曾睡思量玉尺寒裁衣託誰寄

新月不可贈深深羅帷裡纖手弄雙鉤湘簟涼如水

北還旅懷

長江客淚暗青衫誰借秋風挂布帆萬里孤舟
行處是回頭望斷粵林杉

上灘

亂石巖嵒故作堆瀾翻浪鼓雪飛來舟人操縱
輕如葉險處回流水自開

舟次君山望月

月到秋深冷愈孤偏來江夜襯冰壺君山不到
遙相對自把茱萸問岸蘆

廣西恭遇 萬壽聖節赴京奉表稱賀



行次興安縣萬里橋記事

萬里山河萬里途太行襟帶接嵩呼重關紫氣
迎長至百道蠻書奉永圖江漢朝宗臣領袖風
雲入際帝權樞滿帆清節還時望願荅堯天
瑞應符

辛亥除夕奉表進京舟泊江干遇雪

臣惴天涯路風波一夕時年來秦嶺去今日楚
江吹雨雪留寒住星帆帶歲移明朝春正月王
事敢遲遲

陽朔道中咏崖石萬笏朝天字

憤筆書來掃大荒羣峯稽首拜衣裳文章不說
標銅柱石上風生翰墨霜

處處山巒尖入雲攀轅驅轂若爲羣峯烟萬里
無多事剩得崖書寫右軍

粵西太平府卽事坐月

天留小月挂吳鉤又聽弓鳴力不柔
墟廩營開新細柳龍英州映左江樓
交南那處無人賞朔北誰家不舉頭
偏我旅懷聊藉照驚心匣劍可

堪抽

舟行衡山縣道中

山轉人不移隨波東復西不知天造意恰以地
生谿且遂長波遠因依短棹樓弓刀自在目之
子欲何攜

夜宿洞庭湖

吸江不盡駛一水接高天突與山爭峙
因地作渚踞舟憑夜穩拍案說風平方假中宵
夢沙頭鴈破眠

長門月

不知天上意偏宜
照獨人玉階歌舞罷
金鏡奩
粧新萬瓦凝秋碧
千門坐月旻君思
知不盡
忍使露華浸

茅店月

匹馬清秋路西山
日已微
數聲樵牧唱
一色水雲飛
影落孤村道
寒浸旅客衣
隔隣彈鋏者
夢與月空歸

深秋雨

方看黃花曳杖回西山爽氣送青來乍寒野綠
晴猶濯將落殘紅冷不開故欲小春忙待雪且
安半榻慢驚雷秋風疑管人閑事吹碎簷流滴
破苔

竹影

老榦嶙峋映壁疎凌風閃閃獨搖初天成个字
塗蟲篆地作龍文印鳥書一片墨光浮夜色數
竿清致弄寒廬主人高得拾空節葉葉中宵待
月鉤

江舟眺遠

白鷺羣依灘水清
陣成列羽宿沙平
孤舟人唱三更月
萬里秋江一色明

芙蓉花

巧美輕紅伴菊花
滿瓶秋色共丹霞
自憐艷質驚風笑
一片心情籠絳紗